

La refurmaziun en il Grischun (part 2)

Disputaziuns da religiu

Disputaziuns èn discussiuns academicas cuntraversas tranter duas partidas contrahentas. Durant la refurmaziun (dapi la cumparsa da Martin Luther a Lipsia il 1519) furmavan ellas il med preferi per derasar la nova ductrina. En Svizra han gi lieu disputaziuns da religiu oravant tut sin iniziativa da Huldrych Zwingli. En il Grischun èn revolts da purs coincidas cun l'intenziun d'intgins prers d'aderir a la cardientscha refurmada. En consequenza da plants purtads da vart dals catolics cunter ils predicaturs refurmads per avair apparentamain provocà las revolts, è vegnì cità Johannes Comander, il refurmatur principal da Cuira, avant la Dieta federala a Glion dals 8-9 da schaner 1526. Igl è reussi ad el da cuntanscher ina disputaziun davart sias 18 tesas e d'evitar ina condemnaziun per avair derasà eresias ed instigà il pievel. Questa disputaziun è vegnida survegliada da mintgamai dus represchentants da las Lias cun funcziun d'assessurs politics. Da vart catolica han disputà tranter auter l'avat Theodul Schlegel e l'investg auxiliar Stephan Tschuggli, entant che Comander è vegnì sustegnì da Johannes Blasius, Andreas Fabrizius, Philipp Gallicius ed auters. Grazia al rapport da Sebastian Hofmeister enconusch'ins detagls da quella disputaziun. Comander ha relatà durant dus dis da sias tesas, tranter auter davart il papat, il celibat, ils sacraments e la Sontga Tschaina. La Dieta federala ha renunzià ad ina condemnaziun da Comander, dond qua tras a la refurmaziun in ferm schlantsch ch'è anc vegnì rinforzà tras ils Artitgels da Glion dal 1526.

La segunda disputaziun da religiu, provocada tras il battaisem d'urgenza organisà da Chiasper Chiampell per sia biadia Anna, la figlia da Durich, ha gi lieu dals 27 da december 1537 als 4 da schaner 1538 a Susch. Ella è stada – cuntrarri a quella da Glion – ina disputaziun puramain regiunala e serviva oravant tut a sustegnair la refurmaziun en l'Engiadina. Ils partecipants eran quasi exclusivamain spirituals engiadinais e disputavan en latin. Suentier in'emna han ils derschaders decidì ch'il battaisem d'urgenza saja permiss sut tschertas circumstanzas e che mintgin duaja crair en ils auters puncts cuntravers, uschenavant ch'el possia responsar quai envers Dieu e sia conscienza. Cun quai è Chiampell stà salvà e la refurmaziun ha pudì sa derasar en l'Engiadina.

Adolf Collenberg

Sinoda evangelic-retica

Designescha l'urden da la baselgia refurmada stabilì en il Grischun dapi il 16avel tschientaner, reuniun da tut ils plevons refurmads. Il 1526 aveva la Dieta da las Trais Lias acceptà la refurmaziun e cedi a las vischnancas la competenza da decidir davart la cardientscha catolica u refurmada. Quellas avevan era il dretg da tscherner e relaschar libramain lur plevon. Ils reverendas sa radunavan l'emprim sporadicamain per discutir problems professiunals. Sin giavisch da Johannes Comander e da ses amis ha concedì la Dieta ils 14 da schaner 1537 a Cuira a tut ils preditgants il dretg da survegliar la tenuta e la ductrina da lur confrars e d'examinar la ductrina ed ils usits da novs preditgants. L'emprim punct regardava la pretensiu etica ad ina vita devota, determinada en la ductrina da Huldrych Zwingli e da Johannes Calvin, il segund punct sa drizzava tranter auter cunter ductrinas divergentas, sco quella dals anabaptists. Spirituals culpants (d'eresia) duevan vegnir criticatgs ed admonids. La communitad dals preditgants grischuns, che sa radunava ussa mintg'onn en in auter lieu, ha inizià la Sinoda evangelic-retica. Il 1553 ha questa instituziun obtegnì in cunteng pli profund: a basa d'in sboz da Gallicius, approvà da Heinrich Bullinger, ha la radunanza relaschà in veritabel urden sinodal sut il titel «Confessio Raetica». Quest urden nov è vegnì approvà da la Dieta ed è sa mantegnì en ses principis fin en il 19avel tschientaner. Era suenter ha quel subì mo



Las Disputaziuns da religiu a Susch (1537/1544) èn stadas decisivas per la derasaziun da la refurmaziun en l'Engiadina.

pitschnas modificaziuns; ses statuts èn vegnids adattads la davosa giada il 1978 en connex cun la revisiun da la constituziun da la baselgia evangelica dal Grischun. En quella figurescha la Sinoda evangelic-retica, sper tschintg ulteriurs organs da la baselgia chantunala, sco istanza che ademplescha oravant tut incumbensas teologicas e pastorales e che po far dumondas e propostas al Cussegl grond evangelic.

Martin Bundi

Confessiun retica

La gronda affluenza da fugitivs religios talians, persequitads da l'Inquisiziun romana, e las activitads dals anabaptists e d'atras «sectas» refurmatricas han furzà la Sinoda retica da declarar impegnativs ils principis da la baselgia evangelica dal Grischun per mantegnair l'unitad ecclesiastica e confessiunala, tant pli che Pietro Paolo Vergerio pretendeva in'atgna sinoda per ils refurmads da lingua taliana. Il 1552 han Johannes Comander e Philipp Gallicius formulà la Confessiun retica («Confessio Raetica»), entrada en vigor il 1553 suenter esser vegnida examinada ed approvada da Heinrich Bullinger. Per vegnir recepids en la Sinoda retica avevan ils preditgants da signar quella confessiun. La Confessiun retica, remplazzada gia il 1566 da la Confessiun helvetica («Confessio Helvetica posterior») da Bullinger, cumpigliava 65 artitgels ed è vegnida publicada pir il 1772 respectivamain il 1776 en la «Historia reformationis» da Petrus Dominicus Rosius a Porta. Las duas confessiuns èn vegnidas substituidas pli tard tras las uschenumnadas Determinaziuns reglamentaras.

Adolf Collenberg

Corpus evangelic

Ils Artitgels da Glion dal 1524 e dal 1526 furmavan la basa da l'urden da baselgia da las Trais Lias. La Sinoda retica evangelica, fundada il 1537, reglava la vita e la ductrina dals plevons. Ella ha salvà sia emprima radunanza formala enconuschenta il 1547. Dumondas da politica ecclesiastica da la Republica, che surpassavan las competenzas da la Sinoda, vegnivan tractadas e decididas dals mess e da delegads da las confessiuns respectivas, represchentadas dal Corpus evangelic e dal Corpus catholic, en occasiun da dietas e congress/pitags. Quest proceder, numnà Ito in partes, è s'establì suenter ils Scumbigls grischuns. Il Corpus evangelic (*Corpus evangelicum*), numnà en il 17avel tschientaner Sessiun evangelica, ed il Corpus catholic èn cumparids gia dapi il 1623 sco instituziuns permanentas. La Sessiun evangelica tscherneriva da mintga Lia in delega en la Sinoda. L'urden da baselgia da la helvetica è restà in'episoda. Era sch'il Corpus evangelic ed il Corpus catholic han facticamain puspè existì a partir dal 1803, èn els vegnids francads pir en la Constituziun chantunala dal 1854. La Constitu-

ziun dal 1880 ha puspè aboli lur status d'instanzas statals. Ils dus gremis èn però restads de facto en funcziun. Dapi l'introducciun dal nov urden da baselgia evangelic dal 1979 ha il Cussegl grond evangelic (deputads refurmads dal Cussegl grond e 60 delegads dals 10 colloquis) ina funcziun legislativa ed è represchentà cun quatter commembers en il cussegl ecclesiastic (executiva).

Adolf Collenberg

Jacob Spreiter

Attestà per l'emprima giada il 1516 sco chaplon da la plaiv da St. Gallenkirch a Gaschurn (Montafun). A partir dal 1517 è el stà plevon a S. Antònia, nua ch'el ha introduci enturn il 1523/24 la cretta refurmada (emprim passadi da quel gener en il Grischun). Dal 1526-27 ha el operà a Tavau ch'el ha medemamain refurmà. Plinavant ha Spreiter promovì l'introducciun da la refurmaziun en las vischnancas da Claustura, Cunter e Saas en il Partenz.

Martin Bundi

Johannes Comander

* ca. 1485 (Johannes Dorfmann) a Maiavilla, † entschatta 1557 a Cuira. Evtl. figl d'in chapeller. scola da latin a Son Gagl (commiliton da Vadian). Studis a Basilea a partir dal 1502, inscunter cun Zwingli. Sacerdot, tranter auter vicari ad Escholzmatt/LU. Il 1523 è vegnì clamà Comander a S. Martin, la baselgia principala da Cuira. El ha cumenzà a predegiar qua la refurma ch'è s'imponida (cun excepziun dal quartier episcopal) avant la fin dal 1527. Refurmatur principal da Cuira e d'ina gronda part dal Grischun, cun l'agid da Jakob Salzmänn, magister a la scola municipale, e dal 1530-50 da Johannes Blasius. Comander è era stà l'oratur principal a l'impurtanta Disputaziun da religiu da Glion (1526). En quest'ocasiun ha el redigì 18 tesas, fundadas sin ils 67 artitgels da Huldrych Zwingli dal 1523; quellas han servì da basa a las tesas bernaisas dal 1528. Il 1538-39 ha el transformà cun Blasius ed auters refurmads la claustura da dominicans da S. Nicolai a Cuira en ina scola da latin da la Lia da la Chadé. Il 1537 ha la Dieta da las Trais Lias aderi a sia dumonda da crear la Sinoda evangelic-retica. Comander ha redigì in urden da baselgia per Cuira (1545) e cun Philipp Gallicius, il successur da Blasius a la S. Regula, la «Confessio Raetica» che la Sinoda ha adoptà il 1553. Il catechissem, scrit ensemen cun Blasius, è mantegnì sulettamain in la translaziun rumantscha da Jachiam Bifrun (refurmatur da l'Engiadin'Ota), stampada da Dolfino Landolfi a Poschivo il 1552. Sco aderent da Zwingli ha Comander defendì la ductrina eucaristica e cumbattì ils anabaptists (p.ex. Andreas Castelberger). El è s'opponì ultra da quai al servetsch mercenar. Ses correspundents e cussegliaders

principals èn stads Zwingli e Heinrich Bullinger a Turitg sco era Vadian a Son Gagl.

Conradin Bonorand

Jakob Salzmänn [Jacobus Salandronius]

* ca. 1485, † 1526 a Cuira, da Marbach/SG, scrit era Jacobus Salandronius. Studis a Basilea 1504-09, concludì cun il *magister artium*. Magister a la Theodorsschule a Basilea, a partir dal 1511 magister a la scola catedrala da l'investgieu da Cuira, nua che vegnivan instruids spirituals e laics da la citad. Salzmänn è stà l'emprim ami cun l'investg Paul Ziegler e cun l'avat Theodul Schlegel da S. Gliezi/Cuira. A partir dal 1518 è el s'entusiasma per Martin Luther, dal qual el ha derasà cun zeli las scrittiras. Ina viva correspundenza ha el manà cun Huldrych Zwingli e Vadian. Il 1524 ha el bandunà la scola da la catedrala per far il magister da latin a la scola da citad. Ensemen cun Johannes Comander (reverenda da citad a S. Martin a partir dal 1523) è stà Salzmänn in dals promoturs principals da la refurmaziun a Cuira. El ha participà il 1526 a la Disputaziun da religiu a Glion ed è mort il medem onn, ensemen cun tut sia famiglia, da la pestilenza.

Martin Bundi

Johannes Blasius

* ca. 1490, † 18 da fanadur 1550 a Cuira, d'origin nunenconuschent (forsa Val Müstair u Plür). Enconuschent mo en la furma latina dal num. Blasius aveva bunas enconuschentschas da las linguas veglias, inclus l'ebraic. Da ses studis na san ins nagut. Plevon refurmà a Malans 1526-30 ed a S. Regula, la segunda baselgia da la citad da Cuira, 1530-50. Blasius è stà, suenter Johannes Comander, il refurmatur il pli impurtant da Cuira e dal Grischun. El ha participà a las Disputaziuns da religiu a Glion (1526) ed a Susch (1537). Pervia da sia fervenza refurmatrica e sia opposiziun al servetsch da mercenari è el sa fatg blers inimis. Confundatur da la scola da latin a Cuira 1539. La citad da Cuira e la Sinoda evangelica retica han incaricà el savens cun missiuns. Aurtur, ensemen cun Comander, da l'emprim catechissem grischun.

Conradin Bonorand

Hans Capol

* 1470, † 1560, da Flem. Exponent il pli prominent da sia famiglia nobilisada il 1489. Frar da Wolf. Emerita de Mont, da Vella. Bandierel en la Battaglia a la Chalavaina (1499), cumandant d'ina cumpagnia en servetschs venezians 1527, chapitani da las truppas grischunas en la Segunda Guerra da Müsch 1531. President da la vischnanca da Flem 1526, chau da la Lia Grisca 1526-27 e 1529-30. Benefiziari da pensiuns franzosas, ha Capol cumprà il 1529 la mesadad d'ina chasa a Cuira (futur Antistitium). Promotur da la refurmaziun, dals Artitgels da

Glion (1526) e da la fundaziun da pravedas autonomas a Duin, Siat ed Andiastr. Activitad giuridica intensiva 1524-38. President e mediatuor da diversas dretgiras da cumpromiss.

Martin Bundi

Philipp Gallicius [Saluz]

* 4 da favrer 1504 a Puntweil (Puntwyl), vischnanca da Müstair, † 7 da zercladur 1566 a Cuira, dad Ardez. Figl dad Adam Jon Saluz, probablmain ferrer, e dad Uorschla nata Gallicius, da Chamues-ch. Uorschla nata Gallicius, da Susch, sora da Durich. Gallicius purtava il num da la mamma. Studis da teologia ad Ingolstadt 1523. Dal 1524-26 è el stà chaplon a Chamues-ch nua ch'el ha predegià la nova cretta. Participaziun activa a la Disputaziun da religiu a Glion 1526. Inculpà d'eresia, è Gallicius vegnì bandischà ils 15 da mars 1526 da la val tras decisiun da la dretgira penala d'Engiadin'Ota, ma grazia pauc pli tard. Dal 1529-66 è el stà quatter giadas reverenda a Lavin (cun interrupziuns), tranteren a Pralung, Scharons, Malans ed alura a Cuira, nua ch'el ha era instrui latin a la scola da S. Nicolai. Gallicius vala sco il veritabel refurmatuor da l'Engiadina; el ha giugà ina rolla decisiva en las Disputaziuns da religiu da Susch dal 1537 e dal 1544. Precursur da la litteratura ladina sco translatur dal Babnoss, da la Credentscha apostolica e dals Diesch cumandaments (ca. 1536). Ses psalm «Our d'chafuoll bsoeng brag eug proa tai» (1537) è stà l'emprim psalm chantà en latin. Aurtur da la «Confessiun retica» (1553), redigida per incumbensa da la Sinoda. Gallicius ha era scrit las prefaziuns al «Nouf Sainc Testamaint» da Jachiam Bifrun (1560) ed al «Ûn cudesch da psalms» da Durich Chiampell (1562). En l'emprima engrazia el a Dieu, «il quel favella uossa cun nus amiaivelmajng in nos pled, scu ch'el fo eir in tutts oters pajais».

Martin Bundi

Pietro [Pier] Paolo Vergerio

* 1498 a Capodistria (Republica da Vaniescha, oz Slovenia), † 4 d'october 1565 a Tubinga, da Capodistria. Studis da giurisprudenza a Padua. Nunzi en Germania a partir dal 1533. Consecrà investg da Modrus en Croazia il 1536, alura investg da Capodistria. Tras contacts cun exponents dals «spirituals» (refurmists catolics che vulevan renovar internamain la baselgia) e cun refurmaturs tudestgs ha el cumenzà a cultivar ideas refurmatricas ed è perquai vegnì denunzià sco luteran il 1544 e mess avant dretgira a Vaniescha il 1546. Il 1549 ha Vergerio bandunà Capodistria ed ha chattà refugi a Cuira ed a Poschivo. Dal 1550-53 è el stà plevon a Visavraun, nua ch'el è stà activ era sco publicist, stabilind contacts cun ils centers refurmatrics da Basilea, Geneva e Turitg. Dolfino Landolfi ha stampà pregias e publicaziuns da Vergerio ch'èn vegnidas derasadas er en l'Italia, sco era sia «Instruttiun christiana» (1549), l'emprim catechissem protestant en talian. Il 1553 è el sa translocà a Tubinga sco cusseglier dal duca (luteran) Christoph von Württemberg ch'ha delegà el sco missiunari diplomatic en Germania, en ils territoris da la Confederaziun e da las Trais Lias (1561) ed en Pologna. Vergerio è stà il teolog il pli impurtant tranter ils exilants talian en il Grischun, el era dentant en ina relaziun da tensiun permanente cun la Sinoda retica ch'ha negà ina sinoda mo per il Grischun talian e la Vuclina sut sia direzziun. Instigader dals iconoclasts da S. Gaudenzio/Casaccia 1551. El ha refusà la Confessiun retica (1553).

Emidio Campi

Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.